



水
十
日

服部文庫
417
2050
2



117
2050
2

唐詩選卷之三

濟南李攀龍編選

五言律

野望

王績

東臯薄暮望徒倚欲何依樹樹皆秋色山山惟落暉
牧人驅犢返獵馬帶禽歸相顧無相識長歌懷采薇

從軍行

楊炯

烽火照西京心中自不平牙璋辭鳳闕鐵騎繞龍城

雪暗凋旗畫，風多雜鼓聲。寧為百夫長，勝作一書生。

杜少府之任蜀州

王勃

城闕輔三秦，風烟望五津。與君離別意，同是宦遊人。海內存知己，天涯若比鄰。無為在岐路，兒女共沾巾。

勉次樂鄉縣

陳子昂

故鄉杳無際，日暮且孤征。川原迷舊國，道路入邊城。野戍荒烟斷，深山古木平。如何此時恨，嗷嗷夜猿鳴。

春夜別友人

銀燭吐青烟，金尊對綺筵。離堂思琴瑟，別路繞山川。

明月隱高樹，長河沒曉天。悠悠洛陽去，此會在何年。

送別崔著作東征

金天方肅殺，白露始專征。王師非樂戰，之子慎佳兵。海氣侵南部，邊風掃北平。莫賣盧龍塞，歸邀麟閣名。

蓬萊三殿侍宴奉敕詠終南山

杜審言

北斗挂城邊，南山倚殿前。雲標金闕迥，樹杪玉堂懸。半嶺通佳氣，中峯繞瑞烟。小臣持獻壽，長此戴堯天。

和晉陵陸丞早春游望

獨有宦遊人，偏驚物候新。雲霞出海曙，梅柳度江春。

淑氣催黃鳥，晴光轉綠蘋。忽聞歌古調，歸思欲沾巾。

和康五望月有懷

明月高秋迥，愁人獨夜看。暫將弓並曲，翻與扇俱團。
露濯清輝苦，風飄素影寒。羅衣一此鑿，頓使別離難。

送崔融

君王行出將，書記遠從征。祖帳連河闕，軍麾動洛城。
旌旗朝朔氣，笳吹夜邊聲。坐覺烟塵掃，秋風古北平。

扈從登封途中作

宋之問

帳殿鬱崔嵬，仙遊實壯哉。曉雲連幕捲，夜火雜星回。

谷暗千旗出，山鳴萬乘來。扈遊良可賦，終乏揆天才。

送沙門弘景道俊玄莊還荊州應制

一乘歸淨域，萬騎餞通莊。就日離亭近，彌天別路長。
荊南旋杖鉢，渭北限津梁。何日紆真果，還來入帝鄉。

長寧公主東莊侍宴

李嶠

別業臨青甸，鳴鑾降紫霄。長筵鶴鷺集，仙管鳳凰調。
樹接南山近，煙含北渚遙。承恩咸已醉，戀賞未還鑣。
恩敕麗正殿書院賜宴應制得林字

張說

東壁圖書府西園翰墨林誦詩聞國政講易見天心
位竊和羹重恩叨醉酒深載歌春興曲情竭為知音
還至端州驛前與高六別處

舊館分江口淒然望落暉相逢傳旅食臨別換征衣
昔記山川是今傷人代非往來皆此路生死不同歸

幽州夜飲

涼風吹夜雨蕭瑟動寒林正有高堂宴能忘遲暮心
軍中宜劔舞塞上重笳音不作邊城將誰知恩遇深

宿雲門寺閣

孫逖

香閣東山下烟花象外幽懸燈千嶂夕卷幔五湖秋
畫壁餘鴻雁紗窗宿斗牛更疑天路近夢與白雲遊

幸蜀西至劔門

玄宗皇帝

劔閣橫雲峻巒岷出狩回翠屏千仞合丹嶂五丁開
灌木縈旗轉仙雲拂馬來乘時方在德嗟爾勒銘才

塞下曲

李白

塞虜乘秋下天兵出漢家將軍分虎竹戰士臥龍沙
邊月隨弓影胡霜拂劔花玉關殊未入少婦莫長嗟

秋思

唐詩選 卷之三
燕支黃葉落，妾望自登臺。海上碧雲斷，單于秋色來。
胡兵沙塞合，漢使玉關回。征客無歸日，空悲蕙草摧。

送友人

青山橫北郭，白水遶東城。此地一為別，孤蓬萬里征。
浮雲遊子意，落日故人情。揮手自茲去，蕭蕭班馬鳴。

送友人入蜀

見說蠶叢路，崎嶇不易行。山從人面起，雲傍馬頭生。
芳樹籠秦棧，春流遶蜀城。升沈應已定，不必問君平。
秋登宣城謝眺北樓

江城如畫裏，山曉望晴空。兩水夾明鏡，雙橋落彩虹。
人烟寒橘柚，秋色老梧桐。誰念北樓上，臨風懷謝公。

臨洞庭

孟浩然

八月湖水平，涵虛混太清。氣蒸雲夢澤，波撼岳陽城。
欲濟無舟楫，端居恥聖明。坐觀垂釣者，徒有羨魚情。

題義公禪房

義公習禪寂，結宇依空林。戶外一峰秀，階前衆壑深。
夕陽連雨足，空翠落庭陰。看取蓮花淨，方知不染心。

終南山

王維

唐詩選 卷之三 五 嵩山房
太乙近天都，連山到海隅。白雲廻望合，青靄入看無。
分野中峰變，陰晴衆壑殊。欲投人處宿，隔水問樵夫。

過香積寺

不知香積寺，數里入雲峰。古木無人徑，深山何處鐘。
泉聲咽危石，日色冷青松。薄暮空潭曲，安禪制毒龍。

登辨覺寺

竹徑從初地，蓮峰出化城。窻中三楚盡，林外九江平。
嫩艸承趺坐，長松響梵聲。空居法雲外，觀世得無生。

送平淡然判官

不識陽關路，新從定遠侯。黃雲斷春色，畫角起邊愁。
瀚海經年別，交河出塞流。須令外國使，知飲月支頭。

送劉司直赴安西

絕域陽關道，胡沙與塞塵。三春時有雁，萬里少行人。
昔荷隨天馬，蒲萄逐漢臣。當令外國懼，不敢覓和親。

送邢桂州

鏡吹喧京口，風波下洞庭。赭圻將赤岸，擊汰復揚舲。
日落江湖白，潮來天地青。明珠歸合浦，應逐使臣星。
使至塞上

唐詩選 卷之三
單車欲問邊，屬國過居延。征蓬出漢塞，歸雁入胡天。
大漠孤烟直，長河落日圓。蕭關逢候騎，都護在燕然。

觀獵

風勁角弓鳴，將軍獵渭城。艸枯鷹眼疾，雪盡馬蹄輕。
忽過新豐市，還歸細柳營。回看射鵰處，千里暮雲平。

送張子尉南海

岑參

不擇南州尉，高堂有老親。樓臺重蜃氣，邑里雜鮫人。
海暗三山雨，花明五嶺春。此鄉多寶玉，慎勿厭清貧。
寄左省杜拾遺

聯步趨丹陛，分曹限紫微。曉隨天仗入，暮惹御香歸。
白髮悲花落，青雲羨鳥飛。聖朝無闕事，自覺諫書稀。

登總持閣

高閣逼諸天，登臨近日邊。晴開萬井樹，愁看五陵煙。
檻外低秦嶺，牕中小渭川。早知清淨理，常願奉金仙。
送劉評事充朔方判官賦得征馬嘶

高適

征馬向邊州，蕭蕭嘶未休。思深常帶別，聲斷爲兼秋。
岐路風將遠，關山月共愁。贈君從此去，何日大刀頭。

唐詩選 卷之三
七
送鄭侍御謫閩中

謫去君無恨，閩中我舊過。大都秋雁少，只是夜猿多。
東路雲山合，南天瘴癘和。自當逢雨露，行矣慎風波。
使清夷軍入居庸

匹馬行將夕，征途去轉難。不知邊地別，祗訝客衣單。
溪冷泉聲苦，山空木葉乾。莫言關塞極，雨雪尚漫漫。
自薊北歸

驅馬薊門北，北風邊馬哀。蒼茫遠山口，豁達胡天開。
五將已深入，前軍止半迴。誰憐不得意，長劍獨歸來。

醉後贈張九旭

世上漫相識，此翁殊不然。興來書自聖，醉後語尤顛。
白髮老閒事，青雲在目前。床頭一壺酒，能更幾回眠。

登兗州城樓

杜甫

東郡趨庭日，南樓縱目初。浮雲連海岱，平野入青徐。
孤嶂秦碑在，荒城魯殿餘。從來多古意，臨眺獨躊躇。
房兵曹胡馬

胡馬大宛名，鋒稜瘦骨成。竹批雙耳峻，風入四蹄輕。
所向無空闊，真堪託死生。驍騰有如此，萬里可橫行。

春宿左省

花隱掖垣暮，啾啾棲鳥過。
星臨萬戶動，月傍九霄多。
不寢聽金鑰，因風想玉珂。
明朝有封事，數問夜如何。

秦州雜詩

鳳林戈未息，魚海路常難。
候火雲峰峻，懸軍幕井乾。
風連西極動，月過北庭寒。
故老思飛將，何時議築壇。

送遠

帶甲滿天地，胡為君遠行。
親朋盡一哭，鞍馬去孤城。
草木歲月晚，關河霜雪清。
別離已昨日，因見古人情。

題玄武禪師屋壁

何年顧虎頭，滿壁畫滄洲。
赤日石林氣，青天江海流。
錫飛常近鶴，杯渡不驚鷗。
似得廬山路，真隨惠遠遊。

玉臺觀

浩劫因王造，平臺訪古遊。
綵雲蕭史駐，文字魯恭留。
宮闕通群帝，乾坤到十洲。
人傳有笙鶴，時過北山頭。

觀李固請司馬題山水圖

方丈渾連水，天台總映雲。
人間長見畫，老去恨空聞。
范蠡舟偏小，王喬鶴不羣。
此生隨萬物，何處出塵氛。

禹廟

禹廟空山裏，秋風落日斜。
荒庭垂橘柚，古屋畫龍蛇。
雲氣生虛壁，江聲走白沙。
早知乘四載，疏鑿控三巴。

旅夜書懷

細艸微風岸，危檣獨夜舟。
星隨平野闊，月湧大江流。
名豈文章著，官因老病休。
飄飄何所似，天地一沙鷗。
船下夔州郭，病雨濕不得。
上岸別王十二判官，
依沙宿舸船，石瀨月娟娟。
風起春燈亂，江鳴夜雨懸。
晨鐘雲外濕，勝地石堂偏。
柔艣輕鷗外，含悽覺汝賢。

登岳陽樓

昔聞洞庭水，今上岳陽樓。
吳楚東南坼，乾坤日夜浮。
親朋無一字，老病有孤舟。
戎馬關山北，憑軒涕泗流。

次北固山下

王灣

客路青山外，行舟綠水前。
潮平兩岸闊，風正一帆懸。
海日生殘夜，江春入舊年。
鄉書何處達，歸雁洛陽邊。

江南旅情

祖詠

楚山不可極，歸路但蕭條。
海色晴看雨，江聲夜聽潮。
劔留南斗近，書寄北風遙。
為報空潭橘，無媒寄洛橋。

蘇氏別業

別業居幽處到來生隱心
南山當戶牖澧水映園林
竹覆經冬雪庭昏未夕陰
寥寥人境外閒坐聽春禽

望秦川

李頎

秦川朝望迥日出正東
峰遠近山河淨逶迤城闕重
秋聲萬戶竹寒色五陵松
客有歸與歎淒其霜露濃

病龍興寺

綦母潛

香刹夜忘歸松清古殿扉
燈明方丈室珠繫比丘衣
白日傳心淨青蓮喻法微
天花落不盡處處鳥啼飛

胡笳曲

王昌齡

城南虜已合一夜幾重圍
自有金笳引能令出塞飛
聽臨關月苦清入海風微
三奏高樓曉胡人掩淚歸

同王徵君洞庭有懷

張謂

八月洞庭秋瀟湘水北流
還家萬里夢為客五更愁
不用開書帙偏宜上酒樓
故人京洛滿何日復同遊

破山寺後禪院

常建

清晨入古寺初日照高林
曲徑通幽處禪房花木深
山光悅鳥性潭影空人心
萬籟此俱寂惟聞鐘磬音

渡楊子江

丁仙芝

桂楫中流望空波兩畔明林開楊子驛山出潤州城
海盡邊音靜江寒朔吹生更聞楓葉下浙歷度秋聲

聞笛

張巡

岩窈試一臨虜騎附城陰不辨風塵色安知天地心
門開邊月近戰苦陣雲深且夕更樓上遙聞橫笛音

岳陽晚景

張均

晚景寒鴉集秋風旅雁歸水光浮日出霞彩映江飛
洲白蘆花吐園紅柿葉稀長沙甲濕地九月未成衣

穆陵關北逢人歸漁陽

劉長卿

逢君穆陵路匹馬向桑乾楚國蒼山古幽州白日寒
城池百戰後老舊幾家殘處處蓬蒿徧歸人掩淚看

題松汀驛

張祐

山色遠含空蒼茫澤國東海明先見日江白迥聞風
鳥道高原去人煙小徑通那知舊遺逸不在五湖中

聖果寺

釋處默

路自中峰上盤回出薜蘿到江吳地盡隔岸越山多
古木叢青靄遙天浸白波下方城郭近鐘磬雜笙歌

唐詩選卷之三終

唐詩選卷之四

濟南李攀龍編選

五言排律

送劉校書從軍

楊炯

天將下三宮，星門列五戎。坐謀資廟略，飛檄佇文雄。
赤土流星劍，烏號明月弓。秋陰生蜀道，殺氣繞湟中。
風雨何年別，琴樽此日同。離亭不可望，溝水自西東。

靈隱寺

駱賓王

鷲嶺鬱岩峩龍宮鎖寂寥樓觀滄海日門對浙江潮
桂子月中落天香雲外飄捫蘿登塔遠剝木取泉遙
霜薄花更發水輕葉互凋夙齡尚遐異披對滌煩囂
待入天台路看余渡石橋

宿温城望軍營

虜地寒膠折邊城夜柝聞兵符關帝闕天策動將軍
塞靜胡笳徹沙明楚練分風旗翻翼影霜劍轉龍文
白羽搖如月青山斷若雲烟踈疑卷幔塵滅似銷氛
投筆懷班業臨戎想顧勲還應雪漢恥持此報明君

在廣聞崔馬御史並登相臺 蘇味道

振鷺纔飛日遷鶯遠聽聞明光共待漏清覽各披雲
喜得廊廟舉嗟為臺閣分故林懷柏悅新握阻蘭薰
冠去神羊影車迎瑞雉羣遠從南斗外遙望列星文

奉和幸韋嗣立山莊應制 李嶠

南洛師臣契東巖王佐居幽情遺紱冕宸眷矚樵漁
制下峒山蹕恩回灞水興松門駐旌蓋薜幄引簪裾
石磴平黃陸烟樓半紫虛雲霞仙路近琴酒俗塵踈
喬木千齡外懸泉百丈餘崖深經鍊藥穴古舊藏書

唐詩選 卷之四
樹病搏風鳥池潛縱壑魚寧知天子貴尚憶武侯廬

白帝城懷古

陳子昂

日落滄江起停橈問土風城臨巴子國臺沒漢王宮
荒服仍周甸深山尚禹功巖懸青壁斷地險碧流通
古木生雲際歸帆出霧中川途去無限客思坐何窮

峴山懷古

秣馬臨荒甸登高覽舊都猶悲墮淚碣尚想臥龍圖
城邑遙分楚山川半入吳丘陵徒自出賢聖幾凋枯
野樹蒼烟斷津樓晚氣孤誰知萬里客懷古正踟躕

贈蘇味道

杜審言

北地寒應苦南城戍不歸邊聲亂羌笛朔氣捲戎衣
雨雪關山暗風霜艸木稀胡兵戰欲盡漢卒尚重圍
雲淨妖星落秋高塞馬肥據鞍雄劔動搖筆羽書飛
輿駕還京邑朋遊滿帝畿方期來獻凱歌舞共春暉

酬蘇員外味玄夏晚寓直省中見贈

沈佺期

並命登仙閣通宵直禮闈大官供病膳侍史護朝衣
卷幔天河入開窻月露微小池殘暑退高樹蚤涼歸

冠劍無時釋軒車待漏飛明朝題漢柱三署有光輝
同韋舍人早朝

闈闔連雲起巖廊拂霧開玉珂龍影度珠履雁行來
長樂宵鐘盡明光曉奏催一經傳舊德五字擢英材
儼若神仙去紛從霄漢回千春奉休曆分禁喜趨陪

奉和幸長安故城未央宮應制 宋之問

漢王未息戰蕭相乃營宮壯麗一朝盡威靈千載空
皇明悵前跡置酒宴羣公寒輕綵仗外春發幔城中
樂思廻斜日歌詞繼大風今朝天子貴不假叔孫通

奉和晦日幸昆明池應制

春豫靈池會滄波帳殿開舟凌石鯨度槎拂斗牛廻
節晦賞全落春遲柳暗催象溟看浴景燒劫辨沈灰
鎬飲周文樂汾歌漢武才不愁明月盡自有夜珠來

和姚給事寓直之作

清論滿朝陽高才拜夕郎還從避馬路來接珥貂行
寵就黃扉日威廻白簡霜柏臺遷鳥茂蘭署得人芳
禁靜鐘初徹更疎漏更長曉河低武庫流火度文昌
寓直光輝重乘秋藻翰揚暗投空欲報下調不成章

早發始興江口至虛氏村作

候曉踰閩嶂，乘春望越臺。宿雲鵬際落，殘月蚌中開。
薜荔搖青氣，桄榔翳碧苔。桂香多露裊，石響細泉回。
抱葉玄猿嘯，銜花翡翠來。南中雖可悅，北思日悠哉。
鬢髮俄成素，丹心已作灰。何當首歸路，行翦故園菜。

同餞楊將軍兼原州都督御史中丞

蘇題

右地接龜沙，中朝任虎牙。然明方改俗，去病不為家。
將禮登壇盛，軍容出塞華。朔風搖漢鼓，邊月思胡笳。

旗合無邀正，冠危有觸邪。當看勞旋日，及此御溝花。

奉和聖製途經華嶽

張說

西嶽鎮皇京，中峯入太清。玉鑾重嶺應，緹騎薄雲迎。
白日懸高掌，寒空映削成。軒遊會神處，漢幸望仙情。
舊廟青林古，新碑綠字生。羣臣願封岱，迴駕勒鴻名。

奉和聖製早度蒲關

張九齡

魏武中流處，軒皇問道迴。長堤春樹發，高掌曙雲開。
籠負王舟度，人言仙氣來。河津會日月，天仗役風雷。
東顧重關盡，西馳萬國陪。還聞股肱郡，元首咏康哉。

唐詩選 卷之四
和許給事直夜簡諸公

未央鐘漏晚，仙宇靄沈沈。武衛千廬合，巖扃萬戶深。
左掖知天近，南窻見月臨。樹搖金掌露，庭接玉樓陰。
他日聞更直，中宵屬所欽。聲華大國寶，夙夜侍臣心。
逸興乘高閣，雄飛在禁林。寧思竊抃者，情發爲知音。
酬趙二侍御史西軍贈兩省舊寮之作

石室先鳴者，金門待制同。操刀常願割，持斧竟稱雄。
應敵兵初起，緣邊虜欲空。使車經隴月，征旆繞河風。
忽枉兼金訊，非徒秣馬功。氣清蒲海曲，聲滿柏臺中。

顧已塵華省，欣君震遠戎。明時獨匪報，常欲退微躬。
奉和聖製送尚書燕國公說赴朔方軍

宗臣事有征，廟算在休兵。天與三台座，人當萬里城。
朔南方偃革，河右暫揚旌。寵賜從仙禁，光華出帝京。
山川勤遠略，原隰軫皇情。爲奏薰琴倡，仍題瑤劍名。
聞風六郡勇，計日五戎平。山甫歸應疾，留侯功復成。
歌鐘旋可望，枕席豈難行。四牡何時入，吾君聽履聲。
奉和聖製暮春送朝集使歸郡應制

王維

萬國仰宗周，衣冠拜冕旒。玉乘迎大客，金節送諸侯。
祖席傾三省，褰帷向九州。楊花飛上路，槐色蔭通溝。
來預鈞天樂，歸分漢主憂。宸章類河漢，垂象滿中州。

送李太守赴上洛

商山包楚鄧，積翠藹沈沈。驛路飛泉灑，關門落照深。
野花開古戍，行客響空林。板屋春多雨，山城晝欲陰。
丹泉通號略，白羽抵荆岑。若見西山爽，應知黃綺心。

送祕書晁監還日本

積水不可極，安知滄海東。九州何處遠，萬里若乘空。

向國惟看日，歸帆但信風。鰲身映天黑，魚眼射波紅。
鄉國扶桑外，主人孤島中。別離方異域，音信若爲通。

送儲邕之武昌

李白

黃鶴西樓月，長江萬里情。春風三十度，空憶武昌城。
送爾難爲別，銜杯惜未傾。湖連張樂地，山逐泛舟行。
諾謂楚人重，詩傳謝眺清。滄浪吾有曲，寄入櫂歌聲。
陪張丞相自松滋江東泊渚宮 孟浩然

放溜下松滋，登舟命楫師。寧忘經濟日，不憚沍寒時。
洗幘豈獨古，濯纓良在茲。政成人自理，機息鳥無疑。

雲物疑孤嶼江山辨四維晚來風稍緊冬至日行遲
獵響驚鷹雉魚歌激楚辭渚宮何處是川暝欲安之

送柴司戶充劉卿判官之嶺外 高適

嶺外資雄鎮朝端寵節旄月卿臨幕府星使出詞曹
海對羊城濶山連象郡高風霜驅瘴癘忠信涉波濤
別恨隨流水交情脫寶刀有才無不適行矣莫徒勞

陪竇侍御泛靈雲池

白露先時降清川思不窮江湖仍塞上舟楫在軍中
舞換臨津樹歌饒向颺風夕陽連積水邊色滿秋空

乘興宜投轄邀歡莫避驄誰憐持弱羽猶欲伴鷓鴣

行次昭陵

杜甫

舊俗疲庸主群雄問獨夫識歸龍鳳質威定虎狼都
天屬尊堯典神功協禹謨風雲隨絕足日月繼高衢
文物多師古朝廷半老儒直詞寧戮辱賢路不崎嶇
往者災猶降蒼生喘未蘇指揮安率土盪滌撫洪鑪
壯士悲陵邑幽人拜鼎湖玉衣晨自舉鐵馬汗常趨
松柏瞻虛殿塵沙立暝途寂寥開國日流恨滿山隅

重經昭陵

草昧英雄起，謳歌曆數歸。
風塵三尺劍，社稷一戎衣。
翼亮貞文德，丕承戢武威。
聖圖天廣大，宗祀日光輝。
陵寢盤空曲，熊羆守翠微。
再窺松柏路，還見五雲飛。
王閬州筵奉酬十一舅惜別之作

萬壑樹聲滿，千崖秋氣高。
浮舟出郡郭，別酒寄江濤。
良會不復久，此生何太勞。
窮愁但有骨，群盜尚如毛。
吾舅惜分手，使君寒贈袍。
沙頭暮黃鶴，失侶亦哀號。

春歸

苔徑臨江竹，茅簷覆地花。
別來頻甲子，歸到忽春華。

倚杖看孤石，傾壺就淺沙。
遠鷗浮水靜，輕燕受風斜。
世路雖多梗，吾生亦有涯。
此身醒復醉，乘興卽爲家。

江陵望幸

雄都尤壯麗，望幸歛威神。
地利西通蜀，天文北照秦。
風煙含越鳥，舟楫控吳人。
未枉周王駕，終期漢武巡。
甲兵分聖旨，居守付宗臣。
早發雲臺仗，恩波起涸鱗。

奉觀嚴鄭公廳事岷山沱江圖

沱水臨中座，岷山赴北堂。
白波吹粉壁，青嶂插雕梁。
直訝杉松冷，兼疑菱荇香。
雪雲虛點綴，沙艸得微茫。

嶺雁隨毫末，川霓飲練光。
霏紅洲蕊亂，拂黛石蘿長。
暗谷非關雨，丹楓不爲霜。
秋城玄甫外，景物洞庭傷。
繪事功殊絕，幽襟興激昂。
從來謝太傅，丘壑道難忘。
冬日洛城北，謁玄元皇帝廟。
廟有吳道士畫五

聖圖

配極玄都闕，憑高禁籞長。
守祧嚴具禮，掌節鎮非常。
碧瓦初寒外，金莖一氣旁。
山河扶繡戶，日月近雕梁。
仙李盤根大，猗蘭奕葉光。
世家遺舊史，道德付今王。
畫手看先輩，吳生遠擅場。
森羅移地軸，妙絕動宮牆。

五聖聯龍袞，千官列雁行。
冕旒俱秀發，旌旆盡飛揚。
翠柏深留景，紅梨迥得霜。
風箏吹玉柱，露井凍銀床。
身退身周室，經傳拱漢皇。
谷神如不死，養拙更何鄉。

聖善閣送裴迪入京

李頎

雪華滿高閣，苔色上勾欄。
藥艸空堦靜，梧桐返照寒。
清吟可愈疾，携手暫同歡。
墜葉和金磬，饑鳥鳴露盤。
伊流惜東別，灞水向西看。
舊託含香署，雲霄何足難。

早秋與諸子登號州西亭觀眺 岑參

亭高出鳥外，客到與雲齊。
樹點千家小，天圍萬嶺低。

殘虹挂陝北急雨過關西酒盞綠青壁瓜田傍綠溪
微官何足道愛客且相携唯有鄉園處依依望不迷

清明宴司勳劉郎中別業

祖詠

田家復近臣行樂不違親霽日園林好清明烟火新
以文常會友惟德自成隣池照窻陰晚杯香藥味春
欄前花覆地竹外鳥窺人何必桃源裏深居作隱淪
奉使巡檢兩京路種果樹事畢入秦因詠歌

鄭審

聖德周天壤韶華滿帝畿九重承渙汗千里樹芳菲

陝塞餘陰薄關河舊色微發生和氣動封植衆心歸
春露條應弱秋霜果定肥影移行子蓋香撲使臣衣
入徑迷馳道分行接禁闈何當扈仙蹕攀折奉恩輝

行營酬呂侍御

劉長卿

不敢淮南臥來趨漢將營受辭瞻左鉞扶疾拜前旌
井稅鶉衣樂壺漿鶴髮迎水歸餘斷岸烽至掩孤城
晚日當千騎秋風合五兵孔璋才素健早勉檄書成
送鄭說之歙州謁薛侍郎

漂泊來千里謳歌滿百城漢家尊太守魯國重諸生

俗變人難理江傳水至清船經危石住路入亂山行
老得滄洲趣春傷白首情嘗聞馬南郡門下有康成

唐詩選卷之四終

唐詩選卷之五

濟南李攀龍編選

七言律

古意

沈佺期

盧家少婦鬱金堂海燕雙樓玳瑁梁九月寒砧催木
葉十年征戍憶遼陽白狼河北音書斷丹鳳城南秋
夜長誰為含愁獨不見更教明月照流黃

龍池篇

龍池躍龍龍已飛龍德先天天不違池開天漢分黃
道龍向天門入紫微邸第樓臺多氣色君王鳧雁有
光輝為報寰中百川水來朝此地莫東歸

侍宴安樂公主新宅應制

皇家貴主好神仙別業初開雲漢邊山出盡如鳴鳳
嶺池成不讓飲龍川粧樓翠幌教春住舞閣金鋪借
日懸敬從乘輿來此地稱觴獻壽樂鈞天

紅樓院應制

紅樓疑見白毫光寺逼宸居福盛唐支道愛山情漫

切曇摩泛海路空長經聲夜息聞天語鑪氣晨飄接
御香誰謂此中難可到自憐深院得徊翔

再入道場紀事應制

南方歸去再生天內殿今年異昔年見闢乾坤新定
位看題日月更高懸行隨香輦登仙路坐近爐烟講
法筵自喜深恩陪侍從兩朝長在聖人前

遙同杜員外審言過嶺

天長地濶嶺頭分去國離家見白雲洛浦風光何所
似崇山瘴癘不堪聞南浮漲海人何處北望衡陽雁

唐詩選 卷之五
幾群兩地江山萬餘里何時重謁聖明君

興慶池侍宴應制

韋元旦

滄池潏沔帝城邊殊勝昆明鑿漢年
夾岸旌旗疏輦道中流簫鼓振樓船
雲峯四起迎宸幄水樹千重入御筵
宴樂已深魚藻咏承恩更欲奏甘泉

侍宴安樂公主新宅應制

蘇頌

駸駸羽騎歷城池帝女樓臺向晚披
露灑旌旗雲外出風迴巖岫雨中移
當軒半落天河水遶徑全低月樹枝
簫鼓宸遊陪宴日和鳴雙鳳喜來儀

奉和春日幸望春宮應制

東望望春春可憐更逢晴日柳含烟
宮中下見南山盡城上平臨北斗懸
細草偏承回輦處飛花故落舞觴前
宸遊對此歡無極鳥弄歌聲雜管絃

奉和初春幸太平公主南莊應制

主第山門起灞川宸遊風景入初年
鳳皇樓下交天仗烏鵲橋頭敞御筵
往往花間逢綵石時時竹裏見紅泉
今朝扈蹕平陽館不羨乘槎雲漢邊

幽州新歲作

張說

唐詩選 卷之五
去歲荆南梅似雪，今年薊北雪如梅。共知人事何嘗定，且喜年華去復來。邊鎮戍歌連日動，京城燎火徹明開。遙遙西向長安日，願上南山壽一杯。

灑湖山寺

空山寂歷道心生，虛谷迢遙野鳥聲。禪室從來雲外賞，香臺豈是世中情。雲間東嶺千重出，樹裏南湖一片明。若使巢由同此意，不將蘿薜易簪纓。

遙同蔡起居偃松篇

清都衆木總榮芬，傳道孤松最出羣。名接天庭多景

色氣連宮闕，借氛氲懸池的的。停華露，偃蓋重重拂瑞雲。不惜流膏助仙鼎，願將楨榦捧明君。

奉和春日出苑囑目應令

賈曾

銅龍曉關開，安迴金輅春遊博。望開渭水晴光搖，草樹終南佳氣入。樓臺招賢已從商，山老託乘還徵鄴。下才臣在東南獨，留滯忻逢睿藻日邊來。

奉和初春幸太平公主南莊應制

李邕

傳聞銀漢支機石，復見金輿出紫微。織女橋邊烏鵲

唐詩選 卷之九
起仙人樓上鳳皇飛，流風入座飄歌扇。瀑水當隄賤舞衣，今日還同犯牛斗。乘槎共浮海潮歸。

和左司張員外自洛使入京中路先赴長安逢

立春日贈韋侍御及諸公 遜遯

忽覩雲間數雁迴，更逢山上一花開。河邊淑氣迎芳艸，林下輕風待落梅。秋憲府中高唱入春卿，署裏和歌來共言。東閣招賢地自有，西征作賦才。

黃鶴樓

崔顥

昔人已乘白雲去，此地空餘黃鶴樓。黃鶴一去不復

返，白雲千載空悠悠。晴川歷歷漢陽樹，芳艸萋萋鸚鵡洲。日暮鄉關何處是，烟波江上使人愁。

行經華陰

峒堯太華俯咸京，天外三峯削不成。武帝祠前雲欲散，仙人掌上雨初晴。河山北枕秦關險，驛路西連漢

時平。借問路傍名利客，無如此處學長生。

登金陵鳳皇臺

李白

鳳皇臺上鳳皇遊，鳳去臺空江自流。吳宮花草埋幽徑，晉代衣冠成古丘。三山半落青天外，二水中分白

唐詩選 卷之五
鷺洲總爲浮雲能蔽日長安不見使人愁

早朝大明宮呈兩省僚友

賈至

銀燭朝天紫陌長禁城春色曉蒼蒼千條弱柳垂青
瑣百轉流鶯遶建章劍佩聲隨玉墀步衣冠身惹御
爐香共沐恩波鳳池上朝朝染翰侍君王

和賈至舍人早朝大明宮之作

王維

絳幘雞人報曉籌尚衣方進翠雲裘九天閭闔開宮
殿萬國衣冠拜冕旒日色纔臨仙掌動香烟欲傍袞
龍浮朝罷須裁五色詔珮聲歸到鳳池頭

和太常韋主簿五郎溫泉寓目

漢主離宮接露臺秦川一半夕陽開青山盡是朱旗
繞碧澗翻從玉殿來新豐樹裏行人度小苑城邊獵
騎回聞說甘泉能獻賦懸知獨有子雲才

大同殿生玉芝龍池上有慶雲百官共觀聖恩
便賜燕樂敢書卽事

欲笑周文譌燕鎬還輕漢武樂橫汾豈知玉殿生三
秀詎有銅池出五雲陌上堯尊傾北斗樓前舜樂動
南薰共歡天意同人意萬歲千秋奉聖君

唐詩選 卷之五
六
奉和聖製從蓬萊向興慶閣道中留春雨中春
望之作應制

渭水自縈秦塞曲，黃山舊繞漢宮斜。
鸞輿迥出千門柳，閣道迴看上苑花。
雲裏帝城雙鳳闕，雨中春樹萬人家。
爲乘陽氣行時令，不是宸遊玩物華。

救賜百官櫻桃

芙蓉闕下會千官，紫禁朱櫻出上蘭。
纔是寢園春薦後，非關御苑鳥銜殘。
歸鞍競帶青絲籠，中使頻傾赤玉盤。
飽食不須愁內熱，大官還有蔗漿寒。

酌酒與裴迪

酌酒與君君自寬，人情翻覆似波瀾。
白首相知猶按劍，朱門先達笑彈冠。
艸色全經細雨濕，花枝欲動春風寒。
世事浮雲何足問，不如高臥且加餐。

酬郭給事

洞門高閣靄餘暉，桃李陰陰柳絮飛。
禁裏竦鐘官舍晚，省中啼鳥吏人稀。
晨搖玉佩趨金殿，夕奉天書拜瑣闈。
強欲從君無那老，將因臥病解朝衣。

過乘如禪師蕭居士嵩丘蘭若

唐詩選 卷之五
無著天親弟與兄
萬丘蘭若一峰晴
食隨鳴磬巢鳥
下行踏空林
落葉聲迸水
定侵香案濕
雨花應共石
牀平深洞長松何所有
儼然天竺古先生

奉和聖製從蓬萊向興慶閣道中留春雨中春
望之作應制
李愷

別館春還淑氣催
三宮路轉鳳皇臺
雲飛北闕輕陰
散雨歇南山積翠來
御柳遙隨天仗發
林花不待晚風開
已知聖澤深無限
更喜年芳入睿才

送魏萬之京

李頎

朝聞遊子唱離歌
昨夜微霜初度河
鴻雁不堪愁裏
聽雲山況是客中過
關城曙色催寒近
御苑砧聲向晚多
莫是長安行樂處
空令歲月易蹉跎

寄盧司勳員外

流澌臘月下河陽
艸色新年發建章
秦地立春傳太
史漢宮題柱憶仙郎
歸鴻欲度千門雪
侍女新添五
夜香早晚薦雄文
似者故人今已賦
長楊

題璿公山池

遠公遁跡廬山岑
開士幽居祇樹林
片石孤雲窺色

唐詩選 卷之五
相清池皓月照禪心指揮如意天花落坐臥閒房春
艸深此外俗塵都不染唯餘玄度得相尋

寄綦母三

新加大邑綬仍黃近與單車向洛陽顧盼一過丞相
府風流三接令公香南川粳稻花侵縣西嶺雲霞色
滿堂共道進賢蒙上賞看君幾歲作臺郎

送李回

知君官屬大司農詔幸驪山職事雄歲發金錢供御
府書看仙液注離宮千巖曙雪旗門上十月寒花輦

路中不覩聲名與文物自傷留滯去關東

宿瑩公禪房聞梵

花宮仙梵遠微微月隱高城鐘漏稀夜動霜林驚落
葉曉聞天籟發清機蕭條已入寒空靜颯杳仍隨秋
雨飛始覺浮生無住著頓令心地欲歸依

贈盧五舊居

物在人亡無見期閒庭繫馬不勝悲窻前綠竹生空
地門外青山似舊時悵望青天鳴隊葉嶺岼枯柳病
寒鷗憶君淚落東流水歲歲花開知爲誰

望薊門

祖詠

燕臺一去客心驚，笙鼓喧喧漢將營。
萬里寒光生積雪，三邊曙色動危旌。
沙場烽火侵胡月，海畔雲山擁薊城。
少小雖非投筆吏，論功還欲請長纓。

九日登仙臺呈劉明府

崔署

漢文皇帝有高臺，此日登臨曙色開。
三晉雲山皆北向，二陵風雨自東來。
關門令尹誰能識，河上仙翁去不回。
且欲近尋彭澤宰，陶然共醉菊花杯。

五日觀妓

萬楚

西施謾道浣春紗，碧玉今時鬪麗華。
眉黛奪將萱草色，紅裙妬殺石榴花。
新歌一曲令人豔，醉舞雙眸斂鬢斜。
誰道五絲能續命，却令今日死君家。

杜侍御送貢物戲贈

張謂

銅柱朱崖道路難，伏波橫海舊登壇。
越人自貢珊瑚樹，漢使何勞解豸冠。
疲馬山中愁日晚，孤舟江上畏春寒。
由來此貨稱難得，多恐君王不忍看。

送李少府貶峽中王少府貶長沙

高適

嗟君此別意何如，駐馬銜杯問謫居。
巫峽啼猿數行淚，衡陽歸雁幾封書。
青楓江上秋天遠，白帝城邊古木疎。
聖代卽今多雨露，暫時分手莫躊躇。

夜別韋司士

高館張燈酒復清，夜鐘殘月雁歸聲。
只有啼鳥堪求侶，無那春風欲送行。
黃河曲裏沙爲岸，白馬津邊柳向城。
莫怨他鄉暫離別，知君到處有逢迎。

和賈至舍人早朝大明宮之作 岑參

雞鳴紫陌曙光寒，鶯囀皇州春色闌。
金闕曉鐘開萬戶，玉階仙仗擁千官。
花迎劍佩星初落，柳拂旌旗露未乾。
獨有鳳皇池上客，陽春一曲和皆難。

和祠部王員外雪後早朝卽事

長安雪後似春歸，積素凝華連曙輝。
色借玉珂迷曉騎，光添銀燭晃朝衣。
西山落月臨天仗，北闕晴雲捧禁闈。
聞道仙郎歌白雪，由來此曲和人稀。

西掖省卽事

西掖重雲開曙暉，北山疎雨點朝衣。
千門柳色連青瑣，三殿花香入紫微。
平明端笏陪鸞列，薄暮垂鞭信

馬歸官拙自悲頭白盡不如巖下偃荆扉

九日使君席奉餞衛中丞赴長水

節使橫行西出師鳴弓擐甲羽林兒臺上霜威凌州
水軍中殺氣傍旌旗預知漢將宣威日正是胡塵欲
滅時為報使君多泛菊更將絃管醉東籬

首春渭西郊行呈藍田張二主簿

回風度雨渭城西細草新花踏作泥秦女峰頭雪未
盡胡公陂上日初低愁窺白髮羞微祿悔別青山憶
舊溪聞道輞川多勝事玉壺春酒正堪携

暮春虢州東亭送李司馬歸扶風別廬

柳鞦鶯嬌花復殷紅亭綠酒送君還到來函谷愁中
月歸去磻溪夢裏山簾前春色應須惜世上浮名好
是閒西望鄉關腸欲斷對君衫袖淚痕斑

萬歲樓

王昌齡

江上巍巍萬歲樓不知經歷幾千秋年年喜見山長
在日日悲看水獨流猿狖何曾離暮嶺鸕鷀空自泛
寒洲誰堪登望雲烟裏向晚茫茫發旅愁

題張氏隱居

杜甫

春山無伴獨相求，伐木丁丁山更幽。澗道餘寒歷水
雪，石門斜日到林丘。不貪夜識金銀氣，遠害朝看麋
鹿遊。乘興杳然迷出處，對君疑是泛虛舟。

宣政殿退朝晚出左掖

天門日射黃金榜，春殿晴曛赤羽旗。宮艸菲菲承委
珮，爐烟細細駐游絲。雲近蓬萊常五色，雪殘鵙鵲亦
多時。侍臣緩步歸青瑱，退食從容出每遲。

紫宸殿退朝口號

戶外昭容紫袖垂，雙瞻御座引朝儀。香飄合殿春風

轉，花覆千官淑景移。晝漏稀聞高閣報，天顏有喜近
臣知。官中每出歸東省，會送鸞龍集鳳池。

曲江對酒

苑外江頭坐不歸，水晶宮殿轉霏微。桃花細逐楊花
落，黃鳥時兼白鳥飛。縱飲久拚人共棄，懶朝真與世
相違。吏情更覺滄洲遠，老大徒傷未拂衣。

九日藍田崔氏莊

老去悲秋強自寬，興來今日盡君歡。羞將短髮還吹
帽，笑倩旁人爲正冠。藍水遠從千澗落，玉山高並兩

唐詩選 卷之五
峰寒明年此會知誰健醉把茱萸仔細看

望野

西山白雪三城戍南浦清江萬里橋海內風塵諸弟
隔天涯涕淚一身遙惟將遲暮供多病未有涓埃答
聖朝跨馬出郊時極目不堪人事日蕭條

登樓

花近高樓傷客心萬方多難此登臨錦江春色來天
地玉壘浮雲變古今北極朝廷終不改西山寇盜莫
相侵可憐後主還祠廟日暮聊爲梁甫吟

秋興四首

玉露凋傷楓樹林巫山巫峽氣蕭森江間波浪兼天
湧塞上風雲接地陰叢菊兩開他日淚孤舟一繫故
園心寒衣處處催刀尺白帝城高急暮砧

千家山郭靜朝暉日日江樓坐翠微信宿漁人還泛
泛清秋燕子故飛飛匡衡抗疏功名薄劉向傳經心
事違同學少年多不賤五陵衣馬自輕肥

三

蓬萊宮闕對南山，承露金盤青漢間。
西望瑤池降王母，東來紫氣滿函關。
雲移雉尾開宮扇，日繞龍鱗識聖顏。
一臥滄江驚歲晚，幾回青瑣點朝班。

四

昆明池水漢時功，武帝旌旗在眼中。
織女機絲虛夜月，石鯨鱗甲動秋風。
波漂菰米沈雲黑，露冷蓮房墜粉紅。
關塞極天惟鳥道，江湖滿地一漁翁。

吹笛

吹笛秋山風月清，誰家巧作斷腸聲。
風飄律呂相和

切月傍關山，幾處明胡騎。
中宵堪北走，武陵一曲想南征。
故園楊柳今搖落，何得愁中却盡生。

閣夜

歲暮陰陽催短景，天涯風雪霽寒宵。
五更鼓角聲悲壯，三峽星河影動搖。
野哭千家聞戰伐，夷歌幾處起漁樵。
臥龍躍馬終黃土，人事音書漫寂寥。

返照

楚王宮北正黃昏，白帝城西過雨痕。
返照入江翻石壁，歸雲擁樹失山村。
衰年病肺惟高枕，絕塞愁時早

閉門不可久留，豺虎亂南方。實有未招魂。

登高

風急天高猿嘯哀，渚清沙白鳥飛迴。無邊落木蕭蕭下，不盡長江衮衮來。萬里悲秋常作客，百年多病獨登臺。艱難苦恨繁霜鬢，潦倒新停濁酒杯。

闕下贈裴舍人

錢起

二月黃鸝飛上林，春城紫禁曉陰陰。長樂鐘聲花外盡，龍池柳色雨中深。陽和不散窮途恨，霄漢長懸捧日心。獻賦十年猶未遇，羞將白髮對華簪。

和王員外晴雪早朝

紫微晴雪帶恩光，繞仗偏隨鴛鴦行。長信月留寧避曉，宜春花滿不飛香。獨看積素凝清禁，已覺輕寒讓太陽。題柱盛名兼絕唱，風流誰繼漢田郎。

自鞏洛舟行入黃河卽事寄府縣寮友

韋應物

夾水蒼山路向東，東南山豁大河通。寒樹依微遠天外，夕陽明滅亂流中。孤村幾歲臨伊岸，一雁初晴下朔風。爲報洛橋遊宦侶，扁舟不繫與心同。

唐詩選 卷之五
贈錢起秋夜宿靈臺寺見寄

郎士元

石林精舍武溪東，夜叩禪扉謁遠公。
月在上方諸品靜，心持半偈萬緣空。
蒼苔古道行應遍，落木寒泉聽不窮。
更憶雙峰最高頂，此心期與故人同。

長安春望

盧綸

東風吹雨過青山，卻望千門艸色閒。
家在夢中何日到，春來江上幾人還。
川原繚繞浮雲外，宮闕參差落照間。
誰念爲儒逢世難，獨將衰鬢客秦關。

陸勝宅秋雨中探韻同前

張南史

同人永日自相將，深竹閒園偶辟疆。
已被秋風教憶鱸，更聞寒雨勸飛觴。
歸心莫問三江水，旅服從沾九日霜。
醉裏欲尋騎馬路，蕭條是處有垂楊。

鹽州過胡兒飲馬泉

李益

綠楊著水草如烟，舊是胡兒飲馬泉。
幾處吹笳明月夜，何人倚劍白雲天。
從來凍合關山道，今日分流漢使前。
莫遣行人照容鬢，恐驚憔悴入新年。

登柳州城樓寄漳汀封連四州刺史

柳宗元

城上高樓接大荒，海天愁思正茫茫。
驚風亂颭芙蓉水，密雨斜侵薜荔牆。
嶺樹重遮千里目，江流曲似九迴腸。
共來百粵文身地，猶自音書滯一鄉。

奉和庫部盧四兄曹長元日朝迴

韓愈

天仗宵嚴建羽旄，春雲送色曉鷄號。
金爐香動螭頭暗，玉佩聲來雉尾高。
戎服上趨承北極，儒冠列侍映東曹。
太平時節身難遇，郎署何須笑二毛。

唐詩選卷之五終

